

Luisu e Lutziferru

Totu in una, Luisu Brinchettu nci sbattit sa cara in unu muru callenti e arrungiosu comente a unu ferru arruinau. Si fiat accoliau, cussu mangianu proixinu e scuriosu, in is gruttas de montis de Gerameas pro no s'ammoddiai che a una puliga. *E ita at a essiri custa cosa* cumenzat a si pregontai impensamentau. No ndd'apu mai iscipiu nudda e nisciunus, ni pastori ni messaiu, mi nd'at contau. Omini pagu timarosu, ndi bogat un'allumiu de is chi portaiat sempiri in busciacca po ponni fogu a su zigarru, e puru a atera cosa, e ddu frigat in su muru callenti. S'allumiu partit che a unu guettu e fait luxiri unu fueddu iscritu a mannu in pitzu de su muru, chi si presentaiat comente a unu portali antigu.

Mancai no essit spistorau is gradinus de is iscolas s'arrangiaiat finzas a ligi su giornali e su chi bessiat in su televisori. Ma candu arrennescit a ligi s'assustrat, e torrat a segus pro si fuiri cun sa coa in mesu de is cambas, poita in sa porta ddui fiat iscrittu *INFERNO*.

Ma no si fuit, perou, ca sa crosidadi fiat bincendi sa timoria. Si firmat, pensat, e dezeit *casì casì toccu sa porta pro biri chi nc'est genti*.

Unu nau e unu fattu. S'affacciat un'ispezia de mazzamurru, perou prus artu de un'omini, is ogus grogus, a brabitedda de craba e cun su trabuzzu in manus. *E ite s'es circhende innoi, a cust'ora?*

Luisu si fait piticheddu che a unu topi e cun sa pagu boxi chi ddi fiat abarrada circat de ndi bogai carchi fueddu. *Bon'omini*, arrespundit, seu *beniu a domandai chi nci teneis unu furrungoneddu po m'acorraì ca in foras est proende e ddu at frius meda. E deu seu becciu, accanta de morri, giai facci a su baullu*.

Naras bon'omini a mei, conca de cipudda? Non dd'iscis ca seu Lutziferru, su prus dimoniu de totu is tialus e, de cust'inferru, seu su Presidenti? Sissi, Presidenti ca, innoi puru, como, seus a democrazia comente totu is inferrus occidentalis. A d'onni modu ti fazzu presenti ca logu po tui no nci d'est, prima de totu ca no ses ancora mortu e, a pustis, poita no ses mancu pecadori. E cali pecaus iast a essiri fattu, poburu e afrigiù comente ses?

A Luisu Brinchettu fiat torrendiceddu su sanguni a logu, e cumenzaia a pensai ita arrespundi a cussu brafanteri ispiliu. *Deu no seu pecadori? Ma chi apu curtu totu is feminas chi mi funt atressadas, bagadias e coiadas, bellas e legghias, giovanas e beccias, apenas mi sbentulaiant sa faldetta. E apu finzas furau candu su famini mi mussiaiat sa brenti*.

Sigumenti Lutziferru, ca non est dimoniu pro de badas, fiat capazi de ligi in su pensamentu e de totu connoscat sa vida mancai no tenessit su computer de su serviziu segretu, ddi podiat arregordai sa beridadi. *Tui as curtu feminas? Funt is feminas chi ant curtu a tui, becciu e arrebugiu. Ita mi naras de cussa picciochedda, mancu sexi annus*

iat cumpriu e tui portaiast su primu pilu canu, chi t'iat sbuttonau sa bragreta circhendidì contus prima de ti nci scudi a su lettu? E de cussa giovona caputerresa, mulleri de un'avieri, chi si nci fiat istichia a intru de sa machina in s'interi chi fiasc imbuchendi una littera in sa posta e a pustis nci dd'iasc depia portai a pasci in su saltu de su Masu? E de Pinixedda chi si fiat abrancada a tui pro dda consolai sa die e totu chi nc'iant postu su madiru in presoni pro nd'essi furau centu piseddas de casu nou? Mancu comente ladroni nd'ingiuas, poita as furau isceti calincuna arenada, faixedda frisca e cerexia in su cungiau de s'Arrettori. In finis, no ses ancora mortu, tocca baidindi ca ses istrobendimì poita tengu sa pixi callentende in sa cupa e timu chi buddende mi nci bessat, ca in custu inferru teneus pagu linna pro fai fogaronis e finzas pagu pixi.

Luisu Brinchettu fiat abarrau atrudiu de comentis Lutziferru isciriast is cosas a fini a fini ma, puru timende de ddu scontroxiai, s'atrivit a sighiri sa cribata.

Ma gopai Lutziferru, no ddu boliat izzerriai sennori e prus pagu compagno, forzis forzis m'iat bolli fai a cumprendi ca is feminas fiant bagassas e ca po genti che a mei in sa fabrica sua no nc'est mancu un'arreconi, unu stampixeddu, pro m'imbusticai? Cantu a non essiri mortu gei tenit arrexioni, ma cretat puru ca de bivi ndi seu arrosciu dae ora poita seu campendi a tirria, a dispettu.

Lutziferru iat giai perdiu sa passienzia ma, puru essende arrevesciu comente su maistrali, non boliat fai sa figura de persona de mala grazia.

Bandat beni e sigheus a fueddai, ma chi sa pixi ndi bessit de su caddaxiu ddu andas tui a ndi dd'arregolli. Duncas, ca is feminas funt bagassas ddu pensas e ddu naras tui poita ddas iasc a bolliri sempiri a contu tou, cumandadas a petiedda. No cumprendis ca funt ricas de amori comentis funtanas de abba frisca e savoria chi torrant sidi a chini est sidu? last bolli buffai isceti tui? E is aterus?

Ma donniunu buffat in sa funtana sua, ddi torrat Luisu.

Est propriu custu s'isballiu, dd'arrinfiast Lutziferru, poita tui non s'es meri de peruna funtana. Chi bolis essiri meri solamenti tui pigadì una burrica, o un'egua, dda pagas, e issa oberit is coscias solu chi ses tui a dda cumandai, ma a pustis no ti chescis chi s'abba non est frisca e no torrat sidi. S'amori, crei a mei ca de feminas nd'apu biu medas e no pagus, est totu un'atera cosa. Prus a prestu contami poita ses arrosciu de sa vida.

Primamenti, propriu po s'arrexioni chi seus narende, amittit Luisu, poita is feminas no mi castiant prus e mancu si lassant castiai. Pro

is beccius amori no s'ind'agatat prus. Finzas sa femina chi tengu in domu, becionedda issa puru, fait crechis e bogat iscusas de malu pagadori poita s'aina mia, aici murrungiat, est arrunzià e angurda. E tenit finzas arrexioni, ma no nci dd'intrat in conca ca s'amori, comentì fiat alleghende fustei, gopai Lutziferru, est totu atera cosa e no si campat sempiri afruconendi. Prus a prestu ponit a menti a su predi chi dd'imbarazzat su ciorbeddu cun burrumballa. Una cosa troppu trista chi mi ponit mala spezia.

A Lutziferru fiat cumenzende a dd'ammoddai su coru e a ndi ddu parri mali de cuss'omini chi pro si scrufiri si fiat accunnotau a s'accurzai a s'inferru prima de s'ora. Ddu sciu deu puru, Luisicheddu nostru, ca is feminas ant cambiau. Medas funtanas funt isciuttas o ghattant abba isciapida e intrulada cun s'appretu de dinai e apparienza. Is beccius puru funt totu un'atera cosa ca òi parint chena sabidorià, no balint nudda e no serbint a nienti. Ma s'arroscenzia ispaciàt innoi?

Luisu e Lutziferru agiumai si fiant fattus amigus. Su primu no s'incurat prus de su tempus, chi fessit proende o essit iscampiau, e su segundu si fiat iscaresciu de unu totu ca teniat sa pixi buddende. A totu e is duus ddi si dispraxiat de no podi intrai a magasinu a tastai una tassixedda de malavasia. Malavasia in s'inferru non nd'incungiaiant, ma unu zigarru a perunu gei ci fiat.

Torrende a su contu, fait Luisu alluende su zigarru a su Dimoniù, ti depu nai ca tengu arroschia comente a sa petza pudescia totu sa politica. No nddi potzu prus de intendi d'onnia die e a donni ora is ciaciarras de is politicus e de is economistas. Abboxinant ca funt salvende sa genti e su mundu dae is tribulias e invecias sa genti funt appetighendidda de prus in prus e su mundu spingendiceddu a sperefundu. Tenei passienzia, abetai un'ateru pagheddu, corroxinant comentì un'arei de bestiolus, che presto tornerà lo sviluppo e se non diventerete ricchi, tutti starete molto meglio. E ita depu abetai ancora, mali ddus su sichit, e comente fazzu a istai mellus cun sa pensioni chi pighu, miserina e murrungiada che buconi a sorga, a pustis chi apu traballau totu sa vida comente a unu scrau? Finzas su pani chi fiant is mammas nostras s'eis fattu mancaì, ca su chi comporaus a mangianu in sa buttega a meri s'est giai furriau a mazzegani, arrogalla de pedra, mi cumprendit? po preni fundamentas. E no bollu chistionai de gherras, nd'apu connotu troppus in vida mia, ni de annadas carestiosas pro mori ca is sennoris de s'abba cussa dda spraxint a mindigu, e nimancu de bestiamini strasulau dae is verenus impastaus cun is mangimis. Ddi bollu nai solamenti ca òi sa genti est diaderus macca, comentì at nau fullanu in sa televisioni. E chi non est macca diaderus comente iat a podi baliai totu is fullanus, e mi ca nci nd'est medas, sempiri a trevessu e fende dannu che procus in coxina bona?

Maccus meda seus nosus poberus e abisongiosus. Centu concas e centu berritas, si naraiat una borta. Ma òi si podint contai puru milli berritas ma de concas nci nd'est pagheddas. Su mundu est a francas a susu. Is pipius bolint imparai a su babbu a fai fillus, e su cuaddu iat a bolli ponni sa sedda a su meri. Mancu inzertaus prus candu depit benni beranu e candu atongiu. Dae imoi innantis s'at a cuntessi de agatai sa notti a mesudì e su soli a mesenotti, is arrius currendi conca a susu e is montis calendinci a basciu. Nossi, cretamì, gopai, su mundu s'est tramudau in inferru.

Bandat beni, ma firmadi ingunis, ddu stoppat Lutziferru chi no bariat s'ora de truncaì cussu cumiziu. E, tando, poita bolis brintai amarolla in s'inferixeddu cosa mia? Primamente, ca no ddu est tretu mancu po nci sticchiri unu fustigu. Est prenu tipiu de pecadoris chi teneus appillaus cantu pistocus abruschiaus. E no funt pecadoris de tres soddus comente a tui, ma pecadoris berus, de cussus chi ant isdorrobau cittadis potentis e ricas in d'onni corru de furca e chi ant isperdiu popolazionis interas. S'urtimu chi eus postu a molli fogu, beni trebiu e acciottau, est Cristoforu Colombo, chi po bona sorti non est de is columbus de parti nostra, pro essiri fattu a cinixu e a ladamini millionis de indianus cun s'iscusa ca fiant chene Deus, chene rei e finzas chene carzonis. Ma peghixeddus iscuscientziaus comenti a Napoleone, Hitler, Stalin, Franco e aterus chi a cussus, no ddu eus potzius accolliri e, difattis, s'umbra issoro est ancora in giru a supra de bosaterus. Imoi, parit chi siant accanta de mi bocciri a Saddam Hussein e deu non emu a isciri aundi d'arrimai. Perou, apu intendiu ca nc'ant a pensai is fradis arabus a dd'arregolli. Mancu mali ca, òi in die, is capus mannus no morint mai, comente a totu sa genti mala.

Lutziferru puru teniat gana de torrai sulidu e cussa tassixedda de malavasia fiat propiu disigendidda, po dd'indruciai sa gannarozza e ddi sciolli sa lingua. Luisu fiat totu cunfundiu de is arrexionamentus de s'Aremigu, de is calis, a nai sa beridadi, pagu iat cumprendiu, e abarraiat mudu pedrali.

Duncas, sighit su Dimoniu, ti ses cunvintu ca s'inferru meu est pagu prus de una butteghedda de bixinau e ca s'inferru chi si seis fattus in terra est una fabbrica industriali chi nc'ingurtit totu su chi s'agatat a supra de sa terra? In s'inferru globali no funt is pecadoris chi mollint fogu ma is poburus e malasortaus de su mundu. In cussu no poneis a buddiri pixi, ma ferru, atzarzu, uraniu e aterus materialis totus imperaus pro ammanniai e apprendai s'inferru matessi. Est carrigu de macchinas pro fai de totu e primamente pro iscorrocai e bocciri ma puru po improddai cosas de papai e de bufai e pro fai nasci in laboratoriu angioneddus e mallorus e, chi ddus accucat, finzas calincunu pipiu. Depu arreconnosci ca deu, mancaì dimoniu, cussus imbentus non mi ddus seu mai nimancu bisaus. Anzis, mi timu deu puru de fai acabu malu

e de dda finiri comentì unu tialu scorrau, chene trabuzzu e cun s'inferru tancau che a una fabrica petrolchimica.

A Lutziferru agiumai nci ddi scapaiat su prantu. Ca dda podiat acabai disocupau comentì a un'operaiu de sa Cartiera su topi non si dd'iat mai sulau a s'origa. Pro mellus bellesa, pensaiat, non m'ispettat mancu sa cassa integrazione poita su guvernu de dd'oberri a is tialus disocupaus no nddi bolit intendi. Mancu mali ca no tengu famiglia de cresci.

Luisu, biende carchi lagrima in s'ogu de s'amigu, fiat afrigiu che mai mai. *Tocchit, gopai, no si ghettit a terra diaici, provat a surrungiai, de carchi manera ndd'eus a bessiri dae custu mazzamboddiu. Prus a prestu cumenzeus a inbentai su de fai.*

A aparixai un'inbentu, ddi narat Lutziferru tupendisì sa bucca pro non assunconai, *gei si fait a lestru, su malu est a ddu ponni in opera. Deu seu cundennau a abarrai innoi adobiendi sa porta de s'inferrixiddu pro chi non dd'arruat e tui ti depis cuntrunnai in s'inferru globali pro cantu as a bivi. Ma chi as a tenni passienzia e vida longa t'at a suzzedi de biri cosas mannas, ispantos, casi casi miracolos. As a biri cussu inferru globali isfascendisì, arruendindi arrogus, scuatarendisì comentì un'arenada troppu madura. Sa Terra no podit prus baliai totu custas macchinas, totu custus fabricus, totu custus fumus e verenus, totu sa basca. No podit prus baliai chi custus imbentus infernalis, custus diaderus infernalis, non apant lassau logu a sa vida ni de ominis ni de animalis, masedus i arestis, e mancu de erbas e matas. Custu inferru globali nd'at arrui comentì nd'est arrutu s'inferru romanu fende isciaccus e istrupius de donnia forza e calidadi.*

Pro custu, Luisicheddu meu, ti nau cun totu su coru de circa de nci bessiri luegu dae custu inferru globali prima chi abarrist incipiu a sutta de is casteddus iscorrocaus. Bai in bon'ora e pedronamì chi no t'apu potziu arriciri in domu mia.

Luisu puru iat cunprendiu ca fiat benia s'ora de si dispidiri. Fiat accanta de nci ddu bessiri *abarrit cun Deus*, ma si firmat derettu poita non fiat cosa de nai a Lutziferru. Circat de ddi tocai sa manu ma cussu si nci stesiat. Inzandus, ddi narat *bona fortuna* e furriat de palas.

A foras de sa grutta proiat a istrossa. S'abba fiat niedda e buddia comentì fessit arziendindi dae su caddaxiu de pixi. Su xelu puru fiat avvolotau e iscuriosu. Is tronus arrumbulaiant che pedras in su fundu de s'arriu mannu candu in atongiu calat arrennegau. E is lampus curriant de parti in parti comentè fastimus.

Prima de si nci ghettai in mesu de s'istrossa, is lampus, is tronus, su pedriaxiu e is mattas chi zirrichiant e fruscinant che animas in pena, torrat a pensai a Lutziferru chi diaderus, issu imoi ddu podiat nai a sa firma, non fiat leggiu e nieddu comenti ddu pintant cussus chi no dd'ant mai biu . Fiat propiu un povero diavolo, comenti narant is italianus.

Pro affrontai cussu tempus infernali, perou, no ddi bastat su coru. Su berrettu troppu piticcu, a s'orunesa, sa gianchetta istrinta, is crapittas malandadas e is genugus moddis. Eppuru depiat attraversai pro podi iscuccurai e s'incrarei a bidda.

Abettu chi essit iscampiau a lestru no nddi teniat. De si promittiri a santus no ddi pariat cosa seria pro un'amigu friscu de Lutziferru. E de izzeriai a calincunu mancu a nci pensai ca in totu cussa passada non trastillaiat anima bia. Teniat famini, sonnu, sa bucca sicca e marigosa pro mori de su zigarru, e giai timiat sa malasorti de abarrai arresciu in cussa tupa de mattas e arrocas e, ingunis, de dd'acabbai a si morri.

De repente ddi parit de biri, o intendi, unu miraculu, chi mancu nci creiat, ma forzis fiat isceti bisendisì a s'iscida. Eppuru, d'arribaiat una boxi dae mesu de su bentu. No podit essiri. E de chini iat a esseri custa boxi chi giamat su nomini meu...*Luisu, Luisu, Luisicheddu lassadì biri, aundi ses?*

Sa boxi s'acostaiat de prus in prus e si fiat crara comente a una campana...*Ma custa est sa boxi de Olga*, nci di bessit a iscramiu, e subito si ndi strantaxiat che campanili.

Olga fiat una piccioca arribada a bidda dae una terra meda a tesu, forzis dae cussa aundi, naraiant in tempus passaus, sorgeva il sol dell'avvenire, ma fueddaiat sa limba mellus de is sardus e totu, ca imoi mancu dda iscint chistionai, iat fattu amicitia cun feminas i ominis e fiat fainas de carnazera in unu bottegoni de bidda. Arta, bella, is pilus a colori de trigu messau, is ogus mannus e birdis che su mari in istadi, is lavas che cerexia. Is beccius dda castiaiant passende, da spollaiant cun is miradas, circhende de s'arregordai comenti funt fattas is feminas galanas. A Istevini, su fusteri, perou, ddi pariat ca portata pagu ingaungiu poita is tittixeddas fiant giustas e non istravanadas comenti a cussas de is pivellas de sa televisioni. A Luisu, invecias, ddi praxiat de aici.

Olga, apenas s'adobiant, ddi zaccat unu basideddu e Luisu s'annigrat che puddecu. Ddi pigat sa manu e impari movint conca a su cuccuru. Luisu currit e brincat cantu sirboni in su boscu. Dae sa die sa genti dd'iat annomingiau brinchettu.

Castiai ita est capizi de fai s'amori. T'indi bogat dae s'inferru globali e ti nci inpunnat facci a unu mundu chena inferrus. Chena poboresa e trevessuras. Chena maladies e dolus. A fai beccesa in cumpangia de totus, giovanos e anzianus, feminas e ominis. E arrespettau e tentu a contu che mellus cosa.